

MEMORIA XUSTIFICATIVA

CONVENIO ENTRE O IGAPE, O CONCELLO DA CORUÑA, A UNIVERSIDADE DA CORUÑA E O CLÚSTER TIC GALICIA PARA A COMUNICACIÓN E DIFUSIÓN DO PLAN ESTRATÉXICO DA CIDADE DAS TIC

O 18 de febreiro de 2020 o Ministerio de Defensa resolveu outorgar unha concesión demanial á Universidade da Coruña sobre os terreos e as instalacións que conforman a propiedade denominada "Fábrica de Armas da Coruña" situada na Avenida Pedralonga da Coruña. Esta propiedade é de titularidade estatal e está afectada o Ministerio de Defensa, polo que se integran no dominio público da Administración do Estado.

A Cidade das TIC desenvolverase na totalidade do terreo obxecto de concesión e comprende a totalidade dos inmobles da denominada, polo Ministerio de Defensa, "Fábrica de Armas da Coruña". Ten unha superficie aproximada de 127.943 m² e os seus principais inmobles están formados polas 7 naves industriais da antiga fábrica: almacén xeral (1); prensas e cañóns (2); revisión e metroloxía (3); forxa, pulimento e tratamentos térmicos (4); mecanismos, montura e montaxe (5); diversas, electricidade, calderería e soldadura (6); e tratamentos superficiais e areado(7), así como do resto de edificios do complexo. Tamen inclúe a totalidade dos utensilios, maquinaria e demais mobles da mesma.

Sobre os terreos e instalacións da antiga "Fábrica de Armas" estase a crear a "Cidade das TIC", un polo tecnolóxico TIC e de innovación dixital de referencia a nivel nacional e internacional que actúe como un demostrador de tecnoloxías emerxentes, de apoio ao tecido empresarial pola prestación servizos tecnolóxicos avanzados non dispoñibles en Galicia, facilite a instalación de empresas do sector e sirva como vector de crecemento e dinamización económica grazas á creación de startups, o impulso do I+D+i, o fomento do emprendemento e a atracción de empresas multinacionais.

A Cidade das TIC será un ecosistema TIC dinámico e vangardista que combinará:

- Infraestruturas de innovación e servizos TIC avanzados para a innovación industrial.
- Un Parque empresarial TIC para o aloxamento de pequenas e grandes empresas tecnolóxicas.
- Un Campus Tecnolóxico vinculado á UDC con cabida para un Centro de I+D en novas tecnoloxías.
- Unha incubadora empresarial de Alta Tecnoloxía principalmente centrada en Intelixencia Artificial e Big Data.

- Un centro demostrativo e de servizos avanzados que proporcione novos servizos tecnolóxicos ás empresas.
- Espazos de formación e difusión TIC para fomentar a colaboración empresa TIC – universidade.
- A proposta de ser sede dun Nodo da Estratexia Nacional de Intelixencia Artificial
- Servizos de apoio á Cidade: servizos sociais e servizos centrais complementarios.

Durante o ano 2020 a Cidade das TIC recibiu un apoio financeiro de 4,8 millóns de euros da Xunta de Galicia a través do IGAPE para a construción do Centro de Servizos Avanzados – CSA, un centro de demostración, prototipado e lanzamento de proxectos para a implantación das TIC nos sectores económicos de Galicia.

Un proxecto estratéxico desta envergadura precisa dunha decidida aposta institucional así como dun compromiso empresarial evidente que permita lograr que a Cidade das TIC se converta nun verdadeiro Polo das Novas Tecnoloxías no que se estableza un alianza sinérxica entre o ámbito empresarial, o universitario e o institucional que o faga atractivo tanto a nivel nacional como internacional e de acordo cos antecedentes anteriormente indicados o IGAPE, a UDC, o CLUSTER e o CONCELLO teñen interese en xuntar esforzos e por en común as súas sinerxías en prol do desenvolvemento do complexo da Cidade das TIC.

Por iso, o 1 de decembro de 2021 asinouse un convenio entre todas as partes para dinamizar a construción e dotación da Cidade das TIC de xeito que se poida materializar no menor espazo de tempo posible e especificamente abordar a realización das seguintes actuacións:

- Elaboración do Plan director da Cidade das TIC
- Deseño e posta en marcha inicial da súa estrutura de gobernanza que permita ser formalizada a través dunha sociedade pública na que se integren todas as institucións públicas que poden contribuír tanto na fase dos investimentos iniciais como nas fases posteriores.
- Soporte da estrutura de gobernanza provisional e das actuacións preliminares

Ao longo dos anos 2022 e 2023 a Universidade da Coruña UDC como entidade responsable da xestión das accións do convenio e, polo tanto, a entidade responsable ante o resto de asinantes de asegurar a correcta execución das actuacións contempladas, realizou as tarefas encomendadas a Universidade e que se concretaron nos seguintes documentos:

- O Plan estratéxico da Cidade das TIC.
- Unha planificación das actuacións e investimentos para realizar na posta en marcha da Cidade nos próximos anos.
- Un plan de xestión da cidade e das infraestruturas, co deseño dun modelo de negocio sustentable.
- Un plan de sustentabilidade económico-financeiro da Cidade para a

súa fase inicial (posta en marcha do Centro de Servizos Avanzados) e para a fase posterior incluíndo o deseño dun plan de achegas financeiras tanto singulares como recorrentes.

- Informe da constitución da nova sociedade xestora da Cidade das TIC e cuantificación das achegas económicas por parte das administracións públicas que a integran.

Co obxecto ampliar as bases da colaboración entre as partes para consolidar a creación e posta en funcionamento efectiva da Cidade das TIC a través do apoio a realización daquelas actividades consideradas como prioritarias para o período 2023-2024, especificamente as identificadas no eixe de actuación específico denominado **"Comunicación e Difusión do Plan Estratéxico"** coa finalidade de lograr unha comunicación efectiva das actuacións xa desenvolvidas na Cidade das TIC ata o de agora, as previstas para o ano 2024 así como a correlación e o impacto que as mesmas teñen tanto a nivel social como empresarial, propónse a sinatura dun novo convenio.

A colaboración das partes no desenvolvemento desta iniciativa, plasma a efectiva realización dun interese público e fai que resulte xustificada a participación da Administración na actividade prevista para acadar resultados comúns aos intereses das partes asinantes.